



Publicaziuns dalla vischnaunca, jamna 48

Cussegl da vischnaunca

Il cussegl da vischnaunca seraduna venderdis, ils 9 da december 2016, allas 19.30 en casa communal.

Tractandas:

1. Cunvegna da prestaziun Center da formaziun Surselva (messadi nr. 54-2013/2016)
2. Project da canalisaziun Acletta–Funs: Damonda da credit (messadi nr. 55-2013/2016)
3. Moziun – Studi davart la realisabladad d'ina colligiazion dils uclauns Segnas–Acletta ed in'untgida da Segnas enviers Peisel (messadi nr. 56-2013/2016)
4. Ura da damondas (conform ad art. 44 dil regulativ da fatschentas)

Il president dil cussegl da vischnaunca

Preavis davart la seduta constitutiva

Venderdis, ils 13 da schaner 2017 allas 19.00 ha liug en halla Cons la seduta constitutiva dalla nova perioda d'uffeci. Cun quella occasiun vegnan las autoritads communalas saramentadas. Quella manifestaziun ei publica e destinada per l'entira populaziun.

Suprastonza communal

Resultats dallas votaziuns communalas dils 27 da november 2016

Votaziuns communalas

Diember dils votants 1518
Participaziun alla votaziun 78.7%

Credit pil rempar Val Acletta e la Via Acletta

Dau giu cedels	1191	
Cedels vits	5	
Cedels nunvaleivels	9	
Total cedels vits e nunvaleivels	14	
Cedels valeivels	1177	
Gie		835 71%
Na		342 29%

Emprest, garanzia da deficit e contribuziun pils projects dallas Pendericlaras Mustér

Dau giu cedels	1192	
Cedels vits	5	
Cedels nunvaleivels	9	
Total cedels vits e nunvaleivels	14	
Cedels valeivels	1178	
Gie		798 68%
Na		380 32%

Participaziun al parc naziunal Parc Adula

Dau giu cedels	1195	
Cedels vits	18	
Cedels nunvaleivels	10	
Total cedels vits e nunvaleivels	28	
Cedels valeivels	1167	
Gie		561 48%
Na		606 52%

Dretg da recuors

Sebasond sin art. 37 dalla lescha communal da davart ils dretgs politics sa vegnir recurriu encunter las votaziuns communalas dils 27 da november 2016 enteifer treis dis dapi ch'il motiv da recuors ei veg-



nius constataus, sil pli tard denton il tierz di suenter la publicaziun officiala dils resultats. Il recuors ei d'inoltrar alla suprastonza communal.

Disentis/Mustér, ils 27 da november 2016

Votaziun communal dils 27 da november 2016

Cordial engraziament

En num dallas autoritads communalas admettein nus a convischinas e convischins in grond e resentiu engraziament per la clara approbaziun dils credits per il rempar e la correctura dalla Via Acletta sco era per las contribuziuns pils projects dallas Pendicularas Mustér. La dumengia vargada ein 1195 persunas serendidas all'urna, quei che corrispunda ad in'extraordinaria aulta participaziun da 79%. Cun in resultat ordvart positiv da 71% resp. 68% ein ils dus projects communal vegni approvai. Quei resultat ei in clar mussament per ina vesta visiunara e la promptadad da rinforzar il turissem. Cheutras ha nossa vischnaunca tschentau ils binaris economics per nossa vischnaunca pils proxims decennis!

*Suprastonza communal
Francestg Cajacob, president*

Controlla da habitonts

Mortori

Franziska Pally, naschida ils 30 da matg 1922, morta ils 27 da november 2016.

Dascha-pégn per il temps d'advent

A Cuoz sil plaz da lenna sper il stradun metta il menaschi tecnic a disposiziun dascha-pégn. Tgi che fa diever da quei survetsch sa retrer quella naven d'immediat.

*In bi temps d'advent giavischa
Menaschi tecnic Disentis/Mustér*

Clom da quens

Il quen communal vegn serraus giu cun ils 31 da december 2016. Per saver risguardar las expensas occurridas uonn el quen 2016 ei tut tgi che ha aunc da dar quen alla vischnaunca pigl onn current supplicaus da far quei entochen il pli tard ils **19 december 2016**.

Nus supplichein tuttas firmas sco era tut ils officials dalla vischnaunca d'observar quei termin.

Administraziun communal

Via forestala Sars-Brulf

Publicaziun officiala davart restricziun da traffic

En connex cun la meglieraziun funsila ha la suprastonza communal approvau ils 11 d'uost 2014 la separaziun denter las vias d'uaul e las vias funsilas definidas entras igl uffeci d'uaul e prighels dalla natira ed igl uffeci d'agricultura e geoinformaziun dil Grischun.



La via denter Sars e la punt da Brulf ei classificada sco via d'uaul. Tenor art. 13 dalla lescha d'uaul federala ed art. 34 dalla lescha d'uaul cantunala sco era ils art. 26–28 dall'ordinaziun tier la lescha cantunala d'uaul sto l'utilisaziun dallas vias d'uaul per vehichels a motor esser reglamentada. Sin fundament dallas leschas surordinadas sco era tenor art. 11 dil reglament da traffic dalla vischnaunca da Mustér intenda la suprastanza communal d'introducir per la **via d'uaul Sars (vart seniastra dil Rein) entochen Punt da Brulf (vart dretga dil Rein)** suandonta restricziun da traffic:

scamond da carrar cun vehichels a motor, velos a motor e mopeds, signal 2.14.

Excepiu traffic agricol e forestal sco era cun lubientscha da carrar dalla vischnaunca da Mustér.

La mesiras previdas ein vegnidas sclaridas cun la polizia cantunala che ha ils 24 d'october 2016 concediu a basa digl art. 7, al. 1 e 2 dalla lescha introductiva tier la lescha federala da traffic (EGzSVG) la lubientscha per quella restricziun da traffic.

Objecziuns e propostas en connex cun las mesiras da traffic previdas san vegnir inoltradas a scret enteifer 30 dis dapi la publicaziun el «Fegl official dalla Surselva» alla suprastanza communal, caum postal 57, 7180 Disentis/ Mustér. Suenter haver examinau las objecziuns decida la suprastanza communal e publichescha siu conclus el «Fegl official cantunal» cun la pussevividad da contestar il conclus tier la Dertgira administrativa dil cantun Grischun.

La restricziun entra en vigur suenter ch'il termin da recuors tier la dertgira administrativa dil cantun Grischun ei scadius e la signalisaziun corrispundenta montada.

Disentis/Mustér, ils 2 da december 2016

Suprastanza communal

Invitaziun Seniors-Ca

Gievgia, ils 8 da december 2016 allas 14.00–16.30 en halla Cons fit el tgau entochen en aulta vegliadetgna, cun Uschi Martschitsch, Gehirntainerin, SVGT, Vorstandsmitglied Alzheimervereinigung GR Annunzia aunc pusseviva tochen sil pli tard gliendisdis, ils 5 da december 2016 directamein a geraua Cecilia Maissen-Desax, telefon 081 947 50 30 ni per mail cecilia@maissen-desax.ch

Meisa da miezdi organisada da Seniors-Ca e Puntreis

Entschatta: allas 12.15 en Puntreis

Gentar cun treis tratgas inclusiv 3 dl aua dalla spina ed in caffè per 15 francs. Annunzia entochen allas 9.00 dil di a Puntreis (tel. 081 929 56 56)

La meisa da miezdi ei aviarta per mintgin/a. Negin sforz da separticipar suenter all'occurrENZA!

Geraua Cecilia Maissen-Desax, persuna da contact

Clom d'urgenza 118

Preziadas vischinas, prezias vischins

Onn per onn dat ei cass en nies cantun nua ch'ils pumpiers vegnan clamai memia tard sil plaz da seracass. Savens emprovan habitontas e habitonts da cuntoscher pumpiers ch'els enconuschan via telefon privat.

Il temps che va aschia a piarder ha ils davos dus onns caschunau la veta a duas personas el Grischun! Plinavon daventan ils donnos cun mintga minuta spiarsa pli grond. Perquei s'adressesin nus a Vus cun ina ferventa supplica: clamei ils pumpiers mo sur il clom d'urgenza 118. Era sche Vus veis mo in pign problem sa il polizist che pren encunter Vies telefon reagir aschia che mo ina pintga gruppa d'agid ni singulas personas vegnan clamadas. Ulteriuras informaziuns era davart la prevenziun anfleis Vus sin nossa pagina d'internet: www.pumpiers-sursassiala.ch.

Engraziel per Vies sustegn! *Vos pumpiers Sursassiala*



Finiastras d'Advent

Cun gronda premura ed anim han biabein 40 affons dil vischinadi Segnas/Mompé Tujetsch, ensemen cun lur gidonters, creau uonn ils maletgs per las quater finiastras. Las finiastras vegnan aviartas suandontamein ed illuminadas mintga sera naven dallas 17.00–22.00 entochen ils 6 da schaner 2017.

1. *finiastra d'Advent, ils 27-11-2016:* Silvia e Guido Bucheli-Caduff, Via Peisel 2, Segnas
2. *finiastra d'Advent, ils 4-12-2016:* Barla e Mathias Jacomet-Caminada, Via Peisel 20, Segnas
3. *finiastra d'Advent, ils 11-12-2016:* Marlene ed Edwin Deflorin-Rainalter, Gassa da Cuoz 21, Segnas
4. *finiastra d'Advent, ils 18-12-2016:* Rosmarie e Rico Duff-Albin, Via Vallars 9, Segnas

Vegni e contemplei, selegrei e sentupei cun nus!
Cordial'invitaziun *Vischinadi Segnas/Mompé Tujetsch*

Sontgaclau da Funs–Latis–Clavaniev

Sco usitau s'entaupan ils vischins e las vischinas da Funs, Latis e Clavaniev, **sonda, ils 3-12-2016** suenter messa da Sontgaclau, allas 17.00 el curtin dalla «Villa». Plinavon dat ei era uonn in program special pils affons. Per dapli informaziuns: Aurelia Flepp; 076 533 83 60. Bugen fa il Sontgaclau era ina viseta tier Vus a casa. Sontgaclau Clavaniev: Fabio Flepp, fabio@flepps.ch e Funs e Latis: Adrian Huonder, adrian93@gmx.ch.

Nus selegrein d'astgar beneventar vus en il curtin dalla Villa.

«Sibla 2017»

Encuretg redacturas e redacturs

Has tschaffen da scriver texts che furan e fan surir? Lu eis Ti exact la dretga persuna per la redacziun dalla «Sibla». Per quella redacziun enquera l'uniun da tscheiver Mustér numnadamein ella Cadi redacturas e redacturs per saver realisar la Sibla 2017. S'annunzia tier gion.hosang@tscheiver.ch ni per telefon 079 690 97 42.

Encuretg historias

Has da raquintar d'in legher schabetg? Has viu zatgi ch'ei sestalegiaus aschia ch'igl ei da rir da schluppar? Has ina historia nua che Siblus duess aunc furar in tec? Lu annunzia quella a si-blus@tscheiver.ch ni via la pagina d'internet www.tscheiver.ch. La redacziun decida davart la publicaziun dils texts. Texts anonims vegnan buca risguardai.

Sontgaclau viseta ils seniors

Dumengia, ils 4 da december 2016, allas 13.30 en-tochen allas 16.00 en halla Cons.

Cun grond plascher envidein nus convischinas e convischins da 60 onns ensi alla tradiziunala sentu-pada cun Sontgaclau. Cun in pign program, la viseta dil Sontgaclau ed in pushegn lein nus porscher a Vus in pèr emperneivlas uras en buna cumpignia. Nus selegrein da passentar ensemen cun Vus in bi suentermiezdi.

Uniun da dunnas Disentis/Mustér



Sontgaclau da Segnas/Acletta

Sco mintg'onn viseta Sontgaclau da Segnas-Acletta ils **3-12-2016** las famiglias. Per ch'el stoppi buca star avon escha serrada, supplichescha el da comunicar sch'el astga vegnir a far ina viseta. Igl ei d'avantatg sche Vus tarmetteis in pèr cavazzins davart tgei che Sontgaclau duei menziunar enviers ils presents en special ils affons. Igl oremus vegn prelegius sonda allas 21.00 avon baselgia ad Acletta ed allas 23.00 ell'ustria «Cresta» a Segnas. Ei fagess grond plascher d'astgar beneventar ina massa vischins. Las annunzias e cavazzins san vegnir tarmess entochen ils 2-12-2016 alla suondonta adresa: Rafael Maissen, Via Acletta 22, 7180 Disentis/ Mustér ni per mail a: rafaelmaissen@bluewin.ch.

Cordial engraziament
Uniun da giuventetgna Segnas-Acletta.

Stallkino

Film: «La vache» (F 2016)

Mesjamna, ils 7 da december, allas 20.00

«La vache» raquenta la historia d'in pur algerian che siemia dall'exposiziun da biestga ell'Europa. E ei loschs sin sia vacca Jacqueline e fa in viadi a pei naven da sia tiara entochen Paris. Ina sentupada da duas culturas differentas e dus munds agricoli differentes en in film che fa surrir. Entrada libra, collecta.

Uniun samaritana Mustér

Per nossa sera d'advent s'entupein nus ils **12 da december** allas 19.30 el «Catrina Resort». Ei vegn offeriu a tuts participonts l'usitada tscheina e nus lein guder in pèr bialas uras en buna cumpignia. Selegrond sin stedia participaziun salida

vossa menadra tecnic

Sur Sep Fidel Sievi prelegia a Mustér

Igl anteriur plevon da Mustér, sur Sep Fidel Sievi, ha gest ediu in cudisch: «In triangel magic» (Foppa, Vals, Cadi) cun regurdientschas ed eveniments da sia veta.

Presentaziun e prelecziuns han liug **dumengia, ils 11 da december 2016** allas 15.00 en Casa Pun-treis a Mustér.

Corporaziun d'aua Spina da Vin, Disentis/Mustér

Invit alla radunonza generala extraordinaria da mardis, ils 13 da december 2016 allas 20.00 el Center sursilvan d'agricultura a Salaplauna, Mustér

Tractandas

1. Beinvegni
2. Elecziun da dus dumbravuschs
3. Presentaziun dils projects
 - Provediment Caischavedra
 - Avertura quartier Crest Acletta
 - Lingia da circuit S. Catrina–Sax
 - Colligiaziun Cavardiras
4. Votaziun
5. Varia



Tuttas commembras e tuts commembers ein cordialmein envidai e beinvegni.

Per la suprastonza il president, Aluis Flepp

Trer candeilas cun stiva da caffè a Mompé Medel

Sonda, ils 10 da december allas 16.00–22.00 e **dumengia, ils 11 da december** allas 11.00–18.00 en stalla tier Armin Manetsch.

Famiglia Manetsch Müller selegra sin vossa viseta.

Vischinadi d'Acletta

Radunonza generala dil vischinadi d'Acletta, dumengia, ils 11 da december 2016, allas 14.00 ell'ustria dil Catrina Resort. Suenter la radunonza envida la suprastonza ad in suentermiezdi da giugs per pign e grond entochen allas 17.00. Ei vegn offeriu in pign refrestg.

Tractandas:

1. Beinvegni
2. Elecziun dils dumbravuschs
3. Prelecziun ed approbaziun dil protocol
4. Rapport annual dil president
5. Render quen, rapport dils revisurs
6. Elecziuns vischinadi
7. Program da lavur
8. Varia

La suprastonza selegra sin ina stedia participaziun.

La suprastonza
